

Nies Tschespet 40avla annada

In per plaids sin viadi dalla stampa alla stiva

Miu car Tschespet!

Eis ti surstaus, forsa, schizun vilaus, sche jeu, in de tes lecturs, scrivel all'entschatta gest a ti tez, a ti persunalmein in per plaids e sentiments, avon che susentar ils auters lecturs e scutinar che ti arrivies prest sur la sava, che ti viseties gleiti las stivas. Biaga han ins scret e plidau sur da tei, tiu num ei enconuschents a mintga ureglia romontscha. Contas ga has ti purschii tias paginas alvas, sco la neiv el scribent romontsch. Eis staus pazients sut sia plema. Has pertgirau bein il confidau denter tias cuviartas fermas, stgir-verdas sco il pastg dil tschespet muntagnard. E purtau aschia bia legria en vitgs ed uclauns. Has purtau divertiment, has admoniu, has educau, empelau, formau e madirau il pievel romontsch. Ti tuornas onn per onn ed eis daventaus per biars in bien amitg. Jeu sai biars spetgan vess che ti vegnies. Gie, ti satiuas ils giuvens ed ils vegls e portas a mintgin enzatgei. Ed uonn fas ti tia curella per la 40avla gada. Quarter decennis dumbra tiu viadi atras nossa val. Mai staunchels vul ti plidar cun nus sur sort e destin, sur viver e murir dils carstgauns. Per tiu 40avel onn vi jeu gartular e dir engraziell per tut quei che ti has purtau. Ti astgas esser loschs de tia talina. Has capiu de rimnar spigias ord ils megliers ers, dals megliers praus. Vid las paginas de quels 40 frars tacca e brischa il cauld dils mauns e dils cors de romanians valents che carezan ed han carezau la mumma romontscha sco vers affons, el plaid ed ell'ovra. A tut quels astga e duei il pievel romontscha dir da cor engraziell. Per oz stai bein e va tiu viadi en num de Diu e salida tes lecturs!

Cars lecturs!

Uonn arriva nies Tschespet per la 40avla ga. El vegn sco in schierl tgemblau. Tgi ha cavegliau lien quei che el ha de dir a nus? Nies scribent romontsch de Tujetsch, **Ludovic Hendry**. El ei franc buc in jester per igl amitg dils tschespets. Nus vein entupau el ella annada 36 dil Tschespet en sias quater raquintaziuns sut la supplica "Tia veglia daventi". Uonn schenghegia el a nus in roman cul tetel "**Spendra nus dil mal**". Ina secunda supplica ord il babnos. – Sche ins astga far a bein enqual scribent e scarvon cun raschun la remarca: "Tgi che ha nuot de dir duei quescher e buca tener il lectur pil narr ed engular siu temps", per il scribent de nies Tschespet fuss quei in grond entiert ed ina renfatscha veramein nungustificada. Pertgei, gest quei para a mi quei che dat veta alla raquintaziun de Ludovic Hendry: el scriva ord in cor plein garetg de palesar, de dir enzatgei. Quei sto tschaffar il lectur. E pertgei quei garetg?

Igl autur vul buca mussar a nus ina historia veramein capitada e succedida, e nuot auter. El vul migliurar il mund cun ses carstgauns. E quei ei la missiun de mintga carstgaun, era pensum sogn e grond dil scribent che vul entupar e satiuer il concarstgaun tras sias ovras. Ludovic Hendry empeila nus en siu roman atras in mund tschiec de pissiun humana e notg stgirenta e tschenta sper quel in mund sublim de grondezia e forza human-divina. Denter quels dus semova il carstgaun e vegn fiers dad in en l'auter; la nuncarezia, igl odi e la pissiun malregulada catschan il carstgaun a frusta, la carezia e la capientscha spendran il carstgaun dal mal. Presunas che representan il stgir della perdiziun e persunas che representan la glischa dil spindrament entaupan il lectur. Las inas portan disgust, las autras gudognan simpatia. Ni, detg il medem cun auters plaids: il carstgaun ei sin viadi per encurir la carezia. Sche quella vegn snegada ed engulada ad el, rumpa el. Denton, pér il davos mumet, avon che il davos gnierv seigi tschuncaus sa ella aunc spindrar, sch'ella ei gronda e sincera. Gie, il carstgaun ei quei che la carezia fa ordad el.

La materia ch'igl autur tracta per mussar quei che el ha de dir, sias ideas, cumpeggia biaras situaziuns, persunas e relaziuns. Forsa buca tut quell'as ein diltut gartegiadas ella descripziun. Denton il maletg entir ei arundaus, dumignaus dal scribent. Il cudisch, cargaus cun problems che supponan ina certa madirezia della veta, vul anflar via tier il lectur carschii. El sa e duei buc esser lectura per affons.

Ed ussa, il Tschespet duei sez raquintar a vus. Sche biars legian el, mintgin anfla enzatgi per el. Sch'el regala a nus enzatgei per nossa veta, lu ha el ademplier siu pensum ed astga star loschamein sin cruna sper ses cumpogns.

Cun questas lingias hai jeu vuliuu cumpignar il Tschespet tier vus e dumandar per el albiert en vossa stiva. Jeu vi era engraziell agl autur ed a tut ils gidonters per la nova ovra sin cruna della biblioteca romontscha che vul crescer e flurir.

- p – s // GR 10-11-1961